



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.217-2/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Kymete Kicaj, kryesues, Skender Çoçaj dhe Arsim Hamzaj anëtarë, duke vendosur lidhur me ankesën e subjektit politik Aleanca për Ardhmërinë e Kosovës (AAK), me seli në Junik, të parashtruar kundër subjektit politik Lidhja Demokratike e Kosovës (LDK), me seli në Junik, për shkak të parregullsive në ditën e votimit, për Zgjedhjet Lokale në Republikën e Kosovës, të mbajtura më datë 12 Tetor 2025, në seancën e panelit të mbajtur më 24.10.2025, merr këtë:

V E N D I M

Refuzohet e pabazuar ankesa ZL.Anr.217/2025, e datës 14.10.2025, e parashtruar nga subjekti politik Aleanca për Ardhmërinë e Kosovës (AAK), me seli në Junik, kundër subjektit politik Lidhja Demokratike e Kosovës (LDK), me seli në Junik, për shkak të parregullsive në ditën e votimit, për Zgjedhjet Lokale në Republikën e Kosovës, të mbajtura më datë 12 Tetor 2025

A r s y e t i m

Me datën 14.10.2025, PZAP-i, ka pranuar ankesën ZL.Anr.217/2025, nga subjekti politik Aleanca për Ardhmërinë e Kosovës, në të cilën pretendohet se ka dyshime të bazuara në prova për manipulim përgjatë procesit zgjedhor në Komunën e Junikut, konkretisht rritje e pazakontë e numrit të votuesve brenda vetëm dy muajve të fundit deri në shtator, në mënyrë të papërrputhme me trendin e viteve të kaluara dhe me numrin real të banorëve rezidentë në komunë, përfshirje në listat e votuesve e personave me mbiemra që nuk ekzistojnë në asnjë familje apo lagje të njohur në Junik, shtim i votuesve që nuk jetojnë, nuk banojnë dhe nuk kanë asnjë lidhje faktike me territorin e komunës, përfshirë mungesën shtëpive, banesave apo qirave në Junik, vendeve të punës apo bizneseve aktive në këtë komunë, dëshmi të shërbimeve komunale, dhe çdo pasurie tjetër të patundshme.

Tutje parashtruesi i ankesës thekson se këta persona jetojnë, punojnë dhe kanë familjet e tyre aktualisht në adresat e mëparshme, përpara bartjes artificiale të vendbanimit në Junik për qëllime votimi, dhe kjo gjendje është lehtësisht e verifikueshme nga institucionet përkatëse, përmes regjistrave civilë dhe evidencave tatimore, si dhe përmes dëshmive nga komuniteti

lokal. Po ashtu në ankese si shkelje theksohen pjesëmarrja në votim e personave të panjohur, të cilët nuk janë njohur as nga komisionerët e qendrave të votimit e as nga vëzhguesit e partive politike, raportime të shumta nga qytetarët për praninë e personave të panjohur në qendrat e votimit gjatë ditës së zgjedhjeve, prania e automjeteve me targa nga të gjitha rajonet e Kosovës, që vërteton sjelljen e organizuar të votuesve jo rezidentë, dalja masive e votuesve, jo rezidentë në orët e fundit në mbledhje për t'u mos identifikuar se janë votues të ardhur enkas për të votuar Kryetarin R. Shehu, operimi i organizuar në ndërrimin e adresave-vendbanimit në Qendrën për pajisje me dokumente personale në Junik nga vajza dhe dhëndëri i kryetarit R. Shehu dhe në zyrën e gjendjes civile dhe drejtorinë e kadastrit në komunën e Junikut me militantë partiakë të tij, të cilët kanë pasur qasje të drejtpërdrejtë në proceset e regjistrimit civil dhe potencialisht në manipulimin e të dhënave të votuesve.

Tutje parashtuesi thekson se Juniku e ka vetëm një qendër votimi, ku historikisht qytetarët nuk kanë pasur problem për të gjetur vendvotimin apo nuk u është ndërruar vendvotimi, pra nuk ka se si ti ndërrohet dikujt qendra e votimit në Junik sepse është vetëm një qendër, mirëpo ky ndryshim rritje e numrit të votuesve me mbiemra që nuk egzistojnë në Junik.

Në përgjigje në ankese të paraqitur nga Komisioni Qendror i Zgjedhjeve (KQZ) theksohet se KQZ, bazuar në nenin 8 paragrafi 1, dhe 2, nenin 83 të Ligjit Nr.08/L-228 Përgjithshme në Republikën e Kosovës, nenin 3 të Rregullores Zgjedhore Nr.03/2024 Krijimi, Kundërshtimi dhe Konfirmimi i Listës së Votuesve, si dhe nenin 2 të Rregullores Zgjedhore Nr.02/2025 Për Ndryshimin dhe Plotësimin e Rregullores Zgjedhore Nr.03/2024 Krijimi, Kundërshtimi dhe Konfirmimi i Listës së Votuesve, bëhet procesi i krijimi të Listës së Votuesve në Republikën e Kosovës,

Bazuar në dispozitat e mësipërme, KQZ ju njofton se Lista e votuesve përmban të gjitha informacionet e nevojshme, ndër të tjera edhe Qendrën e Votimit në të cilën votuesi është caktuar për të votuar. Ndërrimi i Qendrës së Votimit bazohet në përditësimet e sakta të Regjistrimit Qendror Civil, andaj çdo ndryshim i Qendrës së Votimit, ka ardhur si rezultat i të dhënave të përditësuara të Regjistrimit Qendror Civil.

Përveç të lartcekurave, KQZ vazhdimisht ka bërë fushatë informuese, përmes mediave, rrjeteve sociale dhe mesazheve telefonike për verifikimin e Qendrës së Votimit për votuesit e Republikës së Kosovës, dhe qytetarët kanë pasur të drejtën e ndërrimit të Qendrës së Votimit deri më datën 29.08.2025. Prandaj, pala ankuese është dashur që pretendimet e saj t'i paraqesë gjatë periudhës dhe brenda afatit të përcaktuar për paraqitjen e ankesave lidhur me Listën Votuese, afat i cili ka përfunduar më datën 5 shtator 2025. Në këtë drejtim, vlen të theksohet se Komisioni Qendror i Zgjedhjeve ka certifikuar Listën Votuese brenda dhe jashtë Republikës së Kosovës më datën 6 shtator 2025, pas përfundimit të afatit ligjor për ankese.

PZAP, pas shqyrtimit të kësaj ankese, me vendimin ZL.A.nr.217/2025 të datës 15.10.2025, ka hedhur të palejuar ankesën e subjektit politik Aleanca për Ardhmërinë e Kosovës (AAK), me seli në Junik.

Në procedurë ankimore, Gjykata Supreme e Kosovës, me aktvendimin A.A.nr.92/2025 të datës 20.10.2021, ka aprovuar ankesën e subjektit politik Aleanca për Ardhmërinë e Kosovës

(AAK), me seli në Junik, dhe ka anuluar vendimin e PZAP-it ZL.A.nr.217/2025 të datës 15.10.2025, dhe çështjen e ka kthyer në rivendosje në PZAP.

Me rastin e rivendosjes sipas ankesës së lartë përmendur të subjektit politik Aleanca për Ardhmërinë e Kosovës (AAK), me seli në Junik, duke vepruar në tërësi sipas vërejtjeve të dhëna nga Gjykata Supreme e Kosovës në aktvendimin A.A.nr.92/2025 të datës 20.10.2025, dhe me qëllim të vërtetimit të drejtë dhe të plotë të gjendjes faktike, në këtë procedurë të rivendosjes, Paneli i mbledhur, analizoi dhe vlerësoi të gjitha provat nga shkresat e lëndës, dhe nga teresia e shkresave, provave dhe deshmive është konkluduar se:

- Ankesa është e pabazuar.

Paneli pas shikimit të të gjitha shkresave të lëndës dhe përgjigjes në ankesë, vlerësoj se pretendimet e subjektit politik Aleanca për Ardhmërinë e Kosovës (AAK), me seli në Junik, vlerësoi se janë të pambështetura dhe si të tilla i refuzoj për faktin se nga veprimet e përshkruara në ankesë nuk është arritur që të vërtetohet se ka pasur manipulim përgjatë procesit zgjedhor në Komunën e Junikut, konkretisht gjatë ditës së votimit.

Neni 119 paragrafi 1 të Ligjit Nr.08/L-228 Për Zgjedhjet e Përgjithshme në Republikën e Kosovës, përcakton se *“Personi i cili ka interes ligjor në një çështje brenda juridiksionit të PZAP-it ose të drejtat e të cilit janë shkelur për sa i përket procesit zgjedhor të rregulluar sipas këtij ligji ose rregullave zgjedhore, mund të parashtrojë ankesë në PZAP brenda dyzet e tetë (48) orëve nga momenti i mbylljes së qendrës së votimit dhe PZAP vendos për ankesën brenda nëntëdhjetë e gjashtë (96) orëve nga parashtrimi i saj”*.

Pretendimet që ndërlidhen me rritjen e papritur të numrit të votuesve, përfshirjen e personave të panjohur në listat zgjedhore dhe në procesin e votimit, si dhe veprime të organizuara nga persona të lidhur me strukturat komunale, tani për tani mbeten vetëm në suaza të supozimit nga se nuk janë faktuar apo të dokumentuara me asnjë dëshmi materiale – prove shkresore apo dokumentacion zyrtar nga institucionet kompetente, dhe në mungesë të provave paneli vlerëson se pretendimet e ngritura nuk përmbushin standardin ligjor për të konstatuar parregullsi që do të kishin ndikim të drejtpërdrejtë në rezultatin zgjedhor, andaj si rrjedhojë ankesa refuzohet si e pabazuar.

Keshtu që duke u nisur nga kjo gjendje e fakteve, paneli pas shqyrtimit të përmbajtjes së ankesës dhe pretendimeve të parashtruara në të, vlerëson se ankesa nuk është e mbështetur me prova konkrete, të verifikueshme dhe ligjërisht të pranueshme që do të arsyetonin bazë të artikulueshme për ndërmarrjen e veprimeve juridike ndaj procesit zgjedhor të zhvilluar në Komunën e Junikut.

Prandaj duke marrë parasysh të cekurat si me lartë, Paneli vlerëson se parashtruesi i ankesës në mbështetje të pretendimeve të tij, nuk ka ofruar dëshmi të qarta dhe bindëse, edhe pse në bazë të nenit 117 paragrafi 3 të Ligjit Nr.08/L-228 Për Zgjedhjet e Përgjithshme në Republikën e Kosovës, barra e të provuarit bie mbi ankuesin, në të cilin nen përcaktohet se *“Vendosja për ankesat nga PZAP-ja mbështetet në dëshmi të qarta dhe bindëse”*.

Nisur nga arsyet e theksuara më lartë, e në kuptim të nenit 117 dhe 118 par. 1 dhe 119.1 të LZP-së, paneli, vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.217-2/2025 i datës 24.10.2025

Kryesueset e Panelit

Kymete Kicaj



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.